

الرقصة الأخيرة

الرقصة الأخيرة

شعر

أحمد كمال

الإسكندرية : حناء للنشر

الطبعة الأولى : ٢٠١٨

ISBN 978-977-6535-43-5

رقم الإيداع : ١٤٢٧٧ / ٢٠١٨

ديوى : ٨١١

١٤٤ ص ، ٢٠ سم

---

{ جميع الحقوق محفوظة © }



الإسكندرية ، ج . م . ع

٠١٠١٨٨٣١٣٦١

٠٣/ ٥٧٦٥٧٧٧

المدير العام: عادل أبو الأوانس

---

الإخراج الفني : أميرة مصطفى



# الرقصة الأخيرة

---

شعر

---

أحمد كمال





إهداء خاص

إلى مي حسن

## إهداء

للوحيديون والسكاري  
للي نايم ع الرصيف  
واللي عنده عشرين عماره  
واللي عاش ف الدنيا ضيف  
لمصايين الأرق والاكنتاب  
وللي ضيعو سنين الشباب  
إلى الباحثين عن الله والباحثات  
واللي تعبوا ف ملمة روحهم م الشتات  
إلى المتفائلين ببكره  
واللي عايشين ع اللي مات  
اهديكو ديواني  
نتاج الهم والاحباط

\*\*\*\*\*

إلى الناس اللي ساعدوني  
وقت ما كنت محتاجهم  
إلى الناس اللي وحشوني  
حتى قبل ما أفارقهم  
إلى الجميع ..  
إلى حبري ..  
إلى الأوراق

إلى بكره ..  
إلى امبارح..  
إلى الأشواق  
إلى حتى اللي نسيوني  
بعد ما اقابلهم  
إلى شويه كلام فاضي بردهم  
إلى اللي آمنو بيا وقت ما اتهزيت  
وإلى اللي كسرو فيا لحد ما اتهديت  
إلى القلب اللي شال الهم  
إلى كل حد وبيت  
إلى الجرح اللي ما بيتلم  
بهديكو أشواقي وأحلامي  
وفوقتي بعد أوهامي  
إلى إياد  
ولها كالعادة  
ويا ساده  
متستنوش أي اختلاف  
ولا أي نشاز  
ازاي اكسرف بيوتكم  
ونا بيتي ازاز  
دي حكاية متعاده ميت مرة  
أتحرقت بالجاز  
عن الدين والغربه

عن الاهل والصحبه  
عن اللي تمنيت تكون عكاز  
لكن الناس طبعها بطأل  
والكحل مسيره زوال  
فطبيعي تلاقي نفسك ع الهامش زي  
كدا مش متعاز

\*\*\*\*\*

حاسب من الاحزان و حاسب لها  
حاسب علي رقابيك من قبلها  
راح تنتهي و لابد راح تنتهي  
مش انتهت أحزان من قبلها؟  
عجبي!!!

صلاح جاهين

لم يُخلق قبلي شئ سوى ما هو أبدي،

وإني باقٍ إلى الأبد،

أيها الداخلون اطرحوا عنكم كل أمل.

دانتي - كلمان مكتوبة على باب الجحيم.

طير جريح ف البعد عاجز  
قصاد عيونه رقصت أمانى  
المسيه يا حبيبتى جايز  
تردي روحه ف جسمه تانى



## وهم

وبخاف وسط ترحالك..  
يا حبيبي البعد يحلالك  
وتنسيني  
ولمين غيرك اهدي دواويني ..  
ملككتيني..  
يا اجمل حاجه حصلتلي..  
يا مني قبل تكويني..  
وحشتيني..  
يا نور الصبح ف عنيا ..  
يا آخر حاجه حقيقيه  
وسط الزيف  
يا صيف طويل مغرور..  
عمره بعمر النور ..  
بعذك خريف  
بنزف ف حياتي ع الفاضي ..  
وبقضي العمر ف الماضي..  
وف التخاريف

\*\*\*\*\*

وشفت حلمي وشم على ايديكي..  
عشتي جوايا.. وعشت أنا ف وهمي  
بإني ف ليله افوز بيكي ..  
كأنك كنتي عكازي وانا مكسور

كأني كنت اعمي وكنتي النور  
يا اجمل من بنات الحور  
بيتي سكرت ف عنيكي  
ولا دام الكحل اللي معرفش كحللك  
ولا انتي كحلتيه  
ولا الياسمين اللي زينك عملي جنان..  
ونا الغلطان..  
عشان فكرت الحياة وردتي..  
ومتغطتش من بردتي..  
ففجأه بيكي عييت

\*\*\*\*\*

وما جيت اناديكي ..  
لمحتك طيف ..  
وكنت انا ضيف..  
حاولت اني اغازلك ..  
او اخد من عنيكي يومها معاد..  
ولفيتها بلاد وبلاد..  
وبرجعلك  
كأنتك حاجه سحرالي..  
كأنتك شمس..  
وازاي تغيبني عن بالي..  
يا ساكنه قلبي وخيالي  
يا عايشه من زمان فيا..  
كفاياه غيابك وارجمي شويه

\*\*\*\*\*

يا رحله لو بأيديا ما انهيهما ..  
يا جنه حلمت ادخلها واعيش فيها..  
بعد ما يتغضر ذنبي ..  
عشقتك قولي ايه ذنبي..  
جذور حبك  
ممدوده حتى جذور قلبي ..  
ومن غلبي..  
اعيش ف الدنيا متغمي  
وعمري يضيع..  
ما بين الضحكه والتانيه  
خريف وربيع ..  
لحظات بتتسبب عمرًا..  
وجايز اني اموت قهرًا..  
وجايز كل حاجه اكيد  
ميلادي ابتدا بيكي ..  
ف ليلة عيد  
يا اول فرجه حقيقه ..  
يا اجابه كل سؤال فيا  
بلاش تخلفي المواعيد

\*\*\*\*\*

يا آخر شروق للشمس ف أكواني  
كأنك حاجه مربوطه بكيانني  
صعب اني عنها أحيّد..  
قابلت اصناف البشر  
احرار وعبيد

دينهم كان شرك  
وديئي انا توحيد  
واذا شففتك جايه من بعيد  
راح اسامحك  
حتى لو تيجي متأخر بدون اعذار  
دا حبك صرخه جوايا كما الاعصار  
ولو اكون درويش  
واعملك زار  
واطوح راسي ف الاذكار..  
واهيم ف السما الاولى..  
وأسأل عنك المولى  
يجوز أخسر كذا جوله  
لكني وقت ما أوصلك  
هفوز بالحرب  
ف يا ارب قرب وصلها.. وقلها حايله  
ودها ملكوت مهما أقرب منيش طايله  
البدايات ديما بتسكر..  
لكن الحقيقة ف أي شئ الاحتضار  
\*\*\*\*\*

بحبك  
واقولك تاني ايه  
بحبك بس  
وقلبك لو بقلبي حس..  
لشاف الدنيا حاجه ثانيه..  
ربيعاً عمره ما بيخلص..  
والعمر..  
كل ماله ما بينقص ..

وحاله بهجه من دوامين  
بحبك قلتهالك  
وصعب اكررها لناس تانيين  
بعّت قلبي لشطوطك  
فتاه مرجعش  
يارب الناس  
انا زاهد بقالي سنين ..  
وياما سافرت ف عنهما  
بس مبوصلش  
واتشغل بأيه عنها  
وهي شاغله القلب..  
شاغله العين

\*\*\*\*\*

يارب الخلق  
عبد زليل جايلك سكران..  
وجعه ف غربته إدمان  
وجتلك لجلك تغرفلي مع الحجاج..  
لا انا محتال ولا طبال ولا درويش  
انا عاشق وغيرها مليش  
وحيّ مشتاق كما الحلاج  
صادفت شابه اختصرت الدنيا..  
بقيت ف هواها حاجه تانيه  
يارب الخلق انا محتاج  
لدفا هذه الشبه  
لعبيدك المسكين



من قواعد الحياة:  
قاعدة (١)

ضحكوا عليك وقالوا لك  
الحياه مدرسه..  
اتعلم تبقى حاجه كويسه  
خليك صبور  
و دا اول درس  
اوعى تفكر نفسك مهم ..  
الدنيا فيلم  
ولا عمرك هيكونلك دور ..  
غير دور الكومبارس

## عناد

كانت عنيده بطبعها  
وأنا اصريت على عندي  
وقلت أيام وهتعدي  
هسيها تجرب بُعدي..  
هتмот بعدي  
وهترجلي ندمانه كمان  
مجاش ف بالي هكون كدا مهموم  
وارجع لسفينتي ودوايري فارس مهزوم  
كنت بقول كلها كام يوم ..وهيعدو  
وقلبي لما نسي وعده  
بقى شيء مقسوم  
فيه ناس لو يوم هتودعهم  
فكر نبلا..  
لتكون خسران  
لتكون حاجه ناقصه  
وعلاجك وهم  
وهما الادمان  
فقبل ما تفارق فكر  
قبل ما تفارق قرر  
قبل ما تفارق دور  
على حد هيكونلك راحه

يكونلك وسط العتمه أمان  
واذا ملقتش فصدقني  
خساره تضيع من لوحتك  
سر الالوان  
لو كنت كيان  
فانتا رمادي  
هتسيب عادي  
وتفتكر انك كدا فايذ  
لكنك ف الآخر خسران



من قواعد الحياة:

قاعدة (٢)

مبيمنعش الخوف الموت.. لكنه بيمنع الحياه

وتهرب منين ولفين.. وف كل شئ معاناه

## زي النسيم

زي النسيم  
من جنبي مرت  
عدت وشبكت  
ضلها التاية ف ضليّ  
ومن ساعتها ايه حاصل

تشبه لأيه..  
لكمان قديم بينزف تحت المطر  
كان وشها زي الحليب  
ودا يبقى عيب  
لو مشيت  
من غير ما اقولها  
انها..  
زي القمر

كانت واقفه لوحدها ..  
حسيت اني وحيد زها  
قربت منها سالتها  
- بتحبي أيه؟!

بتحب ريحة الحاجات  
والفرجه م البلكونات

بتفضل صاحيه بالساعات  
ف ليل بيرفض الخضوع  
زي الشمس تايهه..  
لكن عارفه طريقها  
فأحياناً بتتمشى..  
وبتستنى شروقها  
عارفه انها اكيد  
ف طريقها للرجوع

أرتبكت ساعة اللقا  
لما شفت روعي ف عنمها متعلقه  
ف قطرتين متألئين من ميه صافيه  
وحاولت أسيطر على نفسي بالعافيه  
واداري خوفي  
- فلو تحبي.. أوصلك لو كنتي خايفه

وكأن كل شئ موجود هناك  
كما لو كانت عنمها..  
قطعتين سحريتين من كهрман  
وكأنها كانت ملاك..  
وف قريها كان الأمان  
قلبي كان صحرا وبور  
قلبي مطرة نيسان  
قبلها ....  
أنا كنت عايش

أيوه عايش  
لكثي ميت من زمان

كان وشها..  
لونه مسروق م الحليب  
بيشع منه ضي ناعم مبينطفيش  
وعنيها بتقول حكايات..  
زي بحر  
مهما تشرب منه مبيرتويش

وكأنها ام بتحضن م الخوف ابها  
فتمنى يطول حضنها  
وقالت ياريت  
ونا كنت زي آخر شمعه  
بتتمايل وترقص  
قبل رجوع الكهريا للبيت



دور وأوعي تملّ..  
دا هييجي يوم تلقاه  
أقصر طريق للقلب..  
هو طريق الله

## على حافة الانهيار

١

وكان نفسي  
أقابل نفسي جويا  
وأفرد في الهوا شالي  
ومعرفشي انا مالي  
بشكي لدنيتي حالي  
وما بتسمعش  
فببكي كتير  
واخي جويا الدموع  
عشان بخاف ف عيون الناس  
اقابل نفسي وانا موجوع  
بهرب واجرى  
استخبي من الاشياء  
مواكب خواف  
شايله حبيبي  
الي مالها كسوف  
تقابلني على استحياء  
اقنعها ان كل حاجه بخير  
وان الي جاي احسن  
واسألها صدقتي  
تقولي أه  
وانا اصلاً منيش صادق

بتدبجني  
جايز بكره تسامحني  
وجايز لا  
انا ميت مكتوبله حياه  
بهرب م الحياه للموت  
ماشي بالزق  
بحضن كل شئ القاه  
عارف اني مسيري هفارق  
ومش فارق  
بحس بقلة الحيله  
ف قولة آه  
نفسى ف ايد  
تحضني ..  
تطمني  
وصوت اصرخ معاه  
حابس صرخه جوايا  
تهز الكون  
انا حكاية اذا اتقالت  
هبان مجنون  
قولتلها على كل شيء  
ساعه السكون  
لكن صوتي مهبش سمعاه  
هسيها ...  
ف الهوى عايمة  
اصلها دنيا.. مهبش دايمه

وانا عارف..  
سر الوجود  
مسيرها في النهاية تلقاه  
كان لازم اكذب  
علمها وعلى نفسي  
لان دي هي الحياه

٢

بتوب ارجع للذنوب تانى  
دنيتي ليه محصراني  
بقيت تايه مين المذنب  
بقيت تايه مين الجانى  
وحتى مرايتى نكرانى  
فبطلت من زمان جدا  
اشوف ملامحى جواها  
خايف اشوفها القاها  
بقت تجاعيد  
بقايا طفل جوايا  
عايش فى الضلمه متغمي  
كان حلمه يشوف النور  
احلامه مرسومه على تنوره الصوفي  
لما يدورف ليله العيد  
استغفر ربي من ذنبي  
واغسل ايديا من الذنوب

كأني لسه متوضى  
ولابس توب  
اقلع.. البس.. اقلع تانى  
سكتي ليه معاندانى  
ومشوارى بعيد  
غريزتى اصل البلا فيا  
ليه م البدايه يا ربى  
اخترت تحطها فيا  
وتسيبني وحيد

٣

ما بين هوس نفسى  
ووسوسة الشيطان  
لابد وسط البحر  
ابان غرقان  
ومادد ايد  
لحد بعيد  
لا هو شايفتى  
ولا شايفه  
لكن عارفه  
هينقذنى  
بدون اذني  
يخدني للشطان  
مع انه م الاول عارف  
اني بعد شويه

تحديداً ف نص الليل  
هكون سكران  
منا تايه بقالي زمان  
مليش عنوان  
ومش بأيديا صدقني  
دي طبيعة الانسان  
هجري.....  
لكن قطري هيعدي  
وهستنالي قطر جديد  
لونه وردي  
جايب حبيبتى م الغريبه  
لجل ما تحميني من بردي  
وتقولي مش هسيبك  
تاني وحيد



من قواعد الحياة:  
قاعدة (٣)

الغريه مش امكنه وبعاد..  
وشوش تفارقك تقابل وشوش  
دا جايز تكون الغريه  
وجودك وسط ناس لا يحسو بيك ولا يفهموش

## طيف

كان لازم اهرب من عنيني  
مش عايز اغرق تانى فيكي  
اجمل مكان ف ذكرياتي  
لسه شايله حبيبتي ليكي  
يلي قلبك مش ف صفي  
ولا عمرك حببيني  
ليه طيفك بيطاردني  
وليه انتي وحشتيني  
اعلنت ليكي استسلامي  
وليه دمرتي مياديني  
جيوشي مدافعتش عن مدني  
غريب انا جوه مملكتي  
فلا الايام بتنصفني  
ولا الكلمات تقدر  
توصف دموع عيني  
ولا المرديات بتعرفني  
ولا النسيان بيداويني



ضحكتك مُضاد حَيوي لإكتئاب الروح  
شمس تشرق مطرح نظرتك ما تروح

## رقصة باليه

١

ثم إني غصب عني ..  
لسه برضو بجن ليكي  
ثم إني لسه تايه ..  
جوه دوامة عنيني  
ثم إنك كل حاجه ..  
كل ضحكة  
كل ضيِّ  
ثم إني كنت ميت ..  
لمستي روجي ..  
صبحت حيِّ  
ثم تهت ف ليل عنيني  
ثم اهدي ولو شويه  
يعنى بالراحه عليا  
حرام عليكي  
انا لسه من توهاني جيِّ  
ثم كلمه منها ليا  
ثم بوسه  
ثم حضن  
ثم انسى ايه القضية  
ثم اضعف  
ثم أحن

٢

ثم انك حلوه جداً  
زى حلم انا عشت فيه  
ثم إن عنيكى حلوة  
ثم انك حلوة ليه؟  
ثم انك فوق كمانى  
على وتر قلبي وكبانى  
بترقصى رقصة باليه  
ثم يعنى ..  
طب قوليلي  
انتي عايزه منى أيه ؟

٣

ثم انتى وثم انتى  
لأنك انتى كل حاجة  
كنت اتمنى ف يوم تجيى  
ثم انك ضي عيني  
ثم رحتي وفين سنيى  
ثم انى كنت خايف  
من يوم فراقنا ف تسبيى  
ثم تهت ف ليل عنيكى

ثم فجأه ازاي خانوني  
كنت بهرب مني ليكي  
كنت مش داري بجنوني

ثم يمكن ..  
عشقتي غيري  
ثم ضعت  
و أيه مصيري  
ثم إنك كل حاجة  
كنت بتمنى تكوني  
ثم اني كنت بحلم  
تكوني مني تكوني اهلي  
ثم رمشك ليه ندهلي  
ثم ليه نرضى بفراقنا  
ثم ليه دا يكون طريقنا  
ثم عني ليه بعدتي  
ثم كنتي سبب سعادتي  
ثم غبتي زى عادتك  
ففقت متأخر كعادتي !



من قواعد الحياة:  
قاعدة (٤)

بين الابيض والاسود  
فيه الف رمادي  
ف طبيعي لما تتوه  
ما بين الاختيارات عادي

## شر وخير

ف وسط عاصفة الحياه  
هييجي يوم ولازم تختار  
الجنه قصيده تحرقها النار  
الملايكه مدفوعين بغريزتهم  
لكن الشيطان بتدفعه الاقدار  
مخير بين الاختيارات..  
لكفي على الاختيارات مجبر  
أختار الخير ولا أختار الشر  
ما بين طريقين ف وسط البحر  
وياريني كنت اقدر

١

اخترت الخير  
لأن الورد مجبر على لونه  
يشوف الدنيا بعيونه  
مشروع قابل للاصلاح  
مدفوع بغرايزه وجنونه..  
والسنين الملاح  
لكن لكل شئ لعنه  
والاشياء بتوه ف المعنى  
ومفيش حاجه تقدر تجمعنا  
غير الافراح

ناوي اكمل طريقي ..  
مهما كان اللي خسرتة  
انا قلبي حقيقي  
بعيد عن زيفهم .. ونزيفهم ..  
الي مليون كره  
بعكسهم أنا قلبي براح

٢

اخترت الشر  
لأن بدون الشر القصة مش تكمل  
كان لازم أجي على نفسي  
واستحمل ابان شيطان  
صعلوك مملوك ف سوق العمر  
الخير مش ديمًا خير ..  
والشر مش ديمًا شر  
ومفيش من التعاسه مفر  
من خاف البحر .. مات ع البر

\*\*\*\*\*

واخترت الخير ولا اخترت الشر ..  
انا ف الحاليتين مجبر مش حر



من قواعد الحياة:  
قاعدة (٥)

اللى مبيعرفش يتجاهل .. اكيد جاهل  
فن الحياه يعني فن الانسحاب  
ليه مسبتش وقت لما الكل ساب  
وقت لما مكنش فيه شئ يستاهل

## اوبرا

اسير جزيرتك يلي ضيك بيروي ضلي  
اسيرك انتي يا حبيبي  
وبدون عيونك ايه فاضلي  
انا بعضك وانتي كلي  
انتي املي  
وانتي اللى راضي فيكي زلي  
وانتي يا اللي  
قادره تكوني كل حاجه وعكسها  
قادره انك تدبحيني  
ثم تحييني ف وقتها  
وانتي املي م الوجود  
قوامك دا عود  
بيرقص على عزفي  
لكن لحنى حزين  
هبدل نايب بكمانجه  
عشان رقصك يكون احلى  
ومفيش حاجه مستاهله  
لكن الكمان كما الزمان  
احيانا يكونو بايخين  
هجرى على البيانو سيمفونيه باخ  
هألف اوبرا عن قلبي اللى لف و داخ

قلبي اللي ونا ف العشرين سبقي وشاخ  
لعله بعد ما يسافر في عنيني مسافات ..  
يلملم شتات بقايا الحلم ويعافر ..  
يكحل ليله بأمني .. يعود تاني  
لعقله بعدما كان دارويش  
كل محاولاتي ف غيابك.. ليه انتهت بمفيش!



يا كل حاجه مجتش ف وقتها  
فكرتها  
متزعليش مني  
انا عارف ان الخير  
كان يمكن ف بعدك عني

## ما بعد غروب الشمس

الليل نجومه بتستناكي  
 بتسأل عنك يا ملاكي  
 يغيب القمر كأنه ما غاب  
 تغيبني انتي ما بنساكي  
 كنت اصحى الليل بطوله  
 افكر ف كلامي اللي هقوله  
 بعد اذنك تسمحي لي ..  
 أقولك حاجه  
 اعترفك اعتراف  
 حلم صدقته بسذاجه  
 باجي قدامها بخاف  
 القبول كان ف وشى باب وأتسد  
 أحكيها بالعيون ف كلام  
 ترجع نظرتي خايبه بدون الرد  
 أصلي الفجر وأدعيها  
 تصلي هي تدعيه  
 انادي عليها بقلبي  
 بقلبي كانت تناديله  
 اتأمل ف نور ضمها  
 واجري ورا طيفها العابر  
 تهديله نور شمسها  
 وتنورله قناديله

احكيها بالعيون ف كلام  
يمكن تحسى منى غرام  
بعيونها كانت تحكيه  
يا نن عيونى من جوه ..  
لو بيا مره تحسى  
اذا كنتي هتختاربه هو  
مش هتشرق تاني شمسي  
يلي غرقت فيكي سفني  
عايزك تعرفي إني ....  
غيرك عمري ما هتمنى  
يلى هواكي فرض وسنه  
واذا كان العمر مش قضى  
هشمر أيدي واتوضا  
واصلي ركعتين لله  
وهطلب منه يوم ما القاه  
يأنسني بيكي ف الجنه



من قواعد الحياة:  
قاعدة (٦)

اقتل كل امل .. ف عيون العثمانين  
القانون الوحيد ف الكون.. أنه مفيش قوانين  
شياطين ادم بتتبعنا.. ومفيش شئ بقى له معنى..  
ونهرب فين  
اتأمل وجرب تمشي بين الخلق ف الميادين  
فضفض مره.. هتلاقي الجميع مساكين  
دا جايز تكون ارضنا جحيم لناس تانيين

## تلج ونار

تلج ونار ميجمعوش ..  
لازم حد فهم يكون أسبق من الثاني  
لو أنت بدأت ..  
هيقولو عليك عدواني  
لازم النار تحرقك ..  
ومفيش حد هيصدقك  
وطي سقف توقعاتك..  
اعرف أن دي حياتك  
لو الشمس هتتحرقك ..  
القمر موجود  
كأنك يونس جوه حوت  
الرحم بتخلق عدوها ..  
تتمنى حياه  
تلاقي موت  
الطير السارح ف الملكوت ..  
متصدقش أنه مبسوط  
بيسيب بيته اللي من القش بناه ..  
ومهاجر طول الحياه  
يحسد الطير ادم على قيوده..  
ويحسد ادم الطير على سماه  
هي الحياه معقده..  
وكل واحد عايش بتنين جواه

شروخير ..  
خيطة رفيع بينهم فاصل  
ليل نهار  
أيام كئيبه وبتواصل  
ولحن قديم بيناضل ..  
لساه متمسك بالعالم

الدنيا زحام ..  
والفوضى زي عزف ما دام  
قولى يا حمام على أسرارك ..  
سرك ف البير  
وانا راح اقولك  
على سر خطير  
شخصية الناس مضطربه ..  
بين سعيده ومكتئبه  
اوعى تأمن تستغى لولاد حوا ..  
ممکن جدًا على سهوه  
يقنعوك الضهر انك ف قلوبهم ..  
وف العشا تلاقي نفسك شربه



من قواعد الحياة:

قاعدة (٧)

مش واقفه عليك

ولا عمرها يوم وقفت على حد

فعادي هكمل

كلنا فترات وبتعدي ف حياة بعض

## نسيتك

ونسيتك  
نسيت إنك طوق نجاه  
للي رغم الجرح غنى  
واللي وسط الزحمه تاه  
واللي ظن بانه عايش  
رغم ان الموت لقاہ  
واللي كان هيמות عشانك  
لا خوف منعو ولا ملك وجاه  
واللي نفسه يشتريكي  
بس هو مش معاه  
واللي يهرب فيلاقيكي  
كل حاجه ف الحياه  
واللي شاف ف عنيني غربه  
ومهما يبعد دا قضاہ  
واللي آمن م البدايه  
واللي الحد واللي تاه  
واللي مات ف عنيني عايش  
واللي عايش مموتاه  
قوليلي قادره إزاي تكوني  
كل كوني وصوت نداه



من قواعد الحياة:

قاعدة (٨)

الضحكه من قلبك ..

خلتك جراحك تلين

كشركتير قبلك ..

فاضت دموع العين

والنتيجه صدقي..

وحده ف الحالتين

## آخر شروق للشمس

روحتي فراحت روحي ليكي  
ليه خلتيني أتعلق بيكي  
وأشوفك أملي الوحيد ف النجاه  
وما ابتدت معركتي الاخيره  
سبتيني لوحدي ف وش الغزاه  
ف وسط شوارع مدينتي الحزينه  
عيل صغير بيحلم فتاه  
يا شمسي الطاله  
يا اخر محاوله  
غبتي  
فغابت..  
فيا الحياه

متشعلق ف حبال صوتي  
عمال بناديكي  
وبشكي هوايا للنجوم  
رجع الصدا مهزم  
اهملى ليه ندايا  
وكأنه مش ليكي

محتاج لنورك صدقي  
غمضي عنيني وأمني بالأحساس  
هتشوفي حاجه غير بقيه الناس  
وساعتها جايز تعشقي

يا إنعكاسي ف كل حاجه  
ليه مصره ع الغياب  
قلبي ماشي بعكزات  
رجعي زمن الشباب  
او قوليلي بكره جايز  
تقبلي بينا العتاب

انتي سما  
ونا طير من غير جناحات  
انتي شابه  
ونا العمر عدى عليا وفات  
كفايا ارقص على لحنك ..  
وادفا بنور شمسك  
اذا عديتي على قبري  
تحبييني من بين الاموات



من قواعد الحياة:  
قاعدة (٩)

ارفع شكواك لسماك..  
وزور قبور الاوليا  
خلصت كل الأدعيه..  
ومفيش اي معجزات فاضله  
بختصار وبدون مجادله..  
لو الدنيا لو كانت عادله  
لكان الشيطان م الانبيا

## حلم جوه حلم

آخر بوسه ع الجبين دي للفراق..  
اسمحو لي بلاعترف..  
لاول مره مش هخاف..  
لو كلامكو كان نفاق..  
راح نختلف..  
والحقيقه تبان بس ف الاختلاف  
قصوري الرخام ..  
بنيتهما زمان ..  
بايد رسام  
بقت ماضي عدى ..  
بقايا حطام ..  
دخان ورماد..  
شئ من ركام ..  
ضباع الامل ..  
وايه العمل..  
ما بين حرب وسلام ..  
نشوف الشعاع ف اخر النفق  
فنفرح قوام ..  
لكن للأسف..  
كان قمر واتخسف..  
تأمل نهايه للطريق..

تلاقيه ترام  
في الليل..  
أو في النهار..  
ف الرؤية ..  
أو ف العدم ..  
بحس بندم ..  
فبيدأ أدون نزيف الكلام  
كل حاجه ليه بشوقها  
زي حلم جوه حلم  
لو شكيت او حكيت  
هيقولولي مش مهم  
على شط الحياه مستني ..  
مبحوح صوتي..  
مش قادر اغني..  
هدير الامواج وحده بيسمعني ..  
فبيكي لو حدي  
وابكي ايه يعني  
امسك شويه رمل ف ايديا ..  
احاول اني احافظ عليهم  
تشدهم الارض مني ....  
ليه بيهربو ..  
مهما اتبت فيهم..  
من بين صوبعي يتسرسبو..  
زي كل حاجه بتهرب منك للعدم ..  
تحاول انك تحافظ عليها ..

فتضربك الحياه خمسين الم  
زي وردتي  
اللي معرفش هي غدرت بيها  
ولا انا اللي غدرت بيها ..  
قطفتها عشان حبيتها ..  
لكني رويتها بدموعي ....  
وحكيت لها عن اوجاعي  
وعن نفسي كثير ..  
حتى كنت عليها بغير ..  
لكني خفت من نفسي ..  
فخبيتها ..  
عن عيون الناس انا داريتها ..  
بعدت عن شمسهم ..  
سقيتها من ضي قمري ..  
فحنتلهم ..  
ولورجعت لهم ..  
هتحي عني ..  
هبان ضدهم ..  
فققررت اصعب القرارات الممكنه ..  
لو حد لازم يعيش ..  
لو حد جدًا مهم  
يبقى مش هي  
أكيد انا



من قواعد الحياة:  
قاعدة (١٠)

انت المشوار والاختيار  
الاصرار والانكسار..  
السؤال والمسألة  
الحكاية باختصار..  
أنت حل المشكله

متى يا كرام الحي عيني تراكم  
وأسمع من تلك الديار نداكم  
سقاني الغرام كأساً من الحب صافياً  
ياليتته لما سقاني سقاكم  
فَيَا لَيْتَ قَاضِيِ الْحَبِّ يَحْكُمُ بَيْنَنَا  
وَدَاعِيِ الْهَوَى لَمَّا دَعَانِي دَعَاكُمْ  
أمرّ على الأبواب من غير حاجة  
لعلي أراكم أو أرى من يراكم  
-أبو المدين التلمساني-

## عبله

بعيدًا عن بلاد القهر  
 بلاد الكره والغيره  
 انا جايلك من عرض البحر  
 وجايبلك مهر  
 جايبلك عقد يا أميره  
 لآلى .. و مرجان  
 وميت فستان  
 حرير وساتان  
 يارب يكونو على قدك  
 صعب على اي نجمه  
 انها تنافس شمسك  
 ولو لامس النسيم خدك  
 بكون غيران  
 يا حبيبتي ما بينا حيطان  
 مواكب خوف  
 وميت بركان ثائر بينا  
 جنتي لو من غيرك  
 متبقاش جنه  
 دي تبقى نار  
 وطننا ميعرفش معنى الحب  
 وانا ثائر من الثوار  
 وحالف أفوز بيكي  
 وتبقيلي من غنائم الحرب  
 الناس دي حياتهم بهتان

و جايك من الكفر انا  
يا حبيبي الى الايمان  
لعلي بلقاكي اكون فايز  
ومش عايز اكون خسران  
وكمان ف حبك انا طمعان  
بقالي زمان  
عيل بيتهجي حروف اسمه  
اول حروف بينطقها كانت اسمك  
صلى لكل الاوليا  
وكان نفسه  
جسمه يحضن ضلّ جسمك  
يحس بدفا  
وامان  
عبله  
يا اول قبله لعنيا  
افديكي بروحي لو تشفع  
ووقت الحرب لو ينفع  
اموت فيكي ..  
مهو اصل حرهم للكره  
وانا مقطوم على حبك  
وجاي عطشان  
يا عبلة قربي و حني  
انا عنتر ومستني  
بقالي زمان



من قواعد الحياة:  
قاعدة (١١)

عمر الضحكة اذا اتقاس بعمر الوجع لحظات  
تقدر تقول الحزن زي مراتك والفرح دا نذوات

## على شط اسكندرية

غزال ماشي وبيتمختر ..  
على مَهْلُهُ يهدل ويكسر ..  
ف قلوب عُزَال  
طبيعي هتضعف قدامها ..  
لما بتتمايل بقوامها ..  
تعزف موال  
واحد واحد بالراحه ..  
عنيكي جراحه ..  
تديج ف الحال  
ولا الدراعات لما تشمر ..  
خبي المرمر ..  
ليقوم زلزال  
يا سلام ع البرقع لمخرم  
لو بس تحن وتتكرم  
لعملها تمثال  
رجلها منقوشه بالحنه ..  
ريحة الجنه ..  
ولا الخلخال  
حبت تدارى جمالها ..  
لكن مجاش ف بالها ..  
يزيدها حجابها جمال



انا حد أعمى وعمره ما شاف  
فتحت عنيا لقيتني بخاف  
بخاف م النور  
سألت حوالي ميه عراف  
وميت دكتور  
وقلبي ياما لف وطاف  
رجع مكسور  
لا عارف انا مالي..  
ولا ليه الحزن بيحلالي..  
ولا باينودا كأس داير  
وصابني الدور

## هيلانا

بقيت خايف أشوفك  
حتى ف الشارع ولو صدغه  
ساعتها هتسمعي صوتي مهتميش  
ولا فارق معاكي اموت ..  
ولا فارق معاكي أعيش  
زمان كان الجواب فاكرو  
- معاك؟  
- معييش.

\*\*\*\*\*

بقيت خايف أشوفك  
حتى ف الشارع ولو صدغه  
تبصي ف عيني  
تعرفي كل اللي متخي  
عشان عارفه  
بأننا ف النهاية بني آدمين  
وأن الحاجز اللي ما بينا  
دا سور من طين  
يتهد بنظرتك ليا ف غمضة عين

\*\*\*\*\*

وعارفه اني يجوز اضعف  
ما هو قلبي وقلبك  
كانو واحد واتقسمو اتنين  
ما بينهم وعد

وطول العمر متواعدين  
وقلت جازي اللقا مي جيش  
ويجوز بالوقت اقدر أعيش  
لكن عايش لأيه ولبين

\*\*\*\*\*

كنتي هيلانا واتهزمت  
على اسوارك جيوشي وكل قواتي  
لا أنا عارف جرافي ايه  
ولا قادر اكمل خطوه ف حياتي  
لا بأيدينا اللي كان بينا وضيعناه  
ولا نعرف ايه الآتي

\*\*\*\*\*

وكأنك كديه ..  
وأنا مصدقت قمت شبطت  
ف ديل الحلم وأتسعبطت  
وع الحال دا بقالي كتير  
ياريت كان النسيان بالوقت  
وياريت بالوقت يتعلم جناحي يطير

\*\*\*\*\*

حاولت افرد جناحاتي المكسوره  
والملم بقايا الاحلام  
والحكايات والمواضيع  
فرويت شجر عشقي بدموعي  
طرح طيفك ف كل ربيع  
وإذا ضيعت أنا صوتك  
حبيبتي أضيع

لا يخوفني برد الشتاء  
ولا يهزمني طول الحرب  
مدام عطرك ف شرياني  
ياريت كان الربيع طول  
وياريتنا حبيبتني زي زمان  
نرجع كما عهدنا الأول  
فلا يفرق ما بيننا حدود  
ولا يمنعنا شرق وغرب  
ولا نهتم بالدنيا ولا بالحرب  
يقف عندنا الزمان عادي  
فلا ماضي ولا آتي  
ولا ديقه وخنقة روح  
نروح ويا الرياح ماتروح  
جايز نلقى دوا لروحنا  
ولجروحنا هنتعلم فنون الطب

\*\*\*\*\*

فاكره زمان  
لما عنيني جت ف عيني  
وعدتيني وقولتيلي  
لما نتوه أكيد هنعود  
مدام موجود خيار الحب  
ادينا بعد المعاد بمعاد عدنا  
وجمع بيننا تاني الدرب

\*\*\*\*\*



سلبت ليلى مني العقلا  
قلت: يا ليلي إرحمي القتلا  
حيها مكنون في الحشا مخزون  
أيها المفتون هم بها ذلا  
إنني هائم ولها خادم  
أيها اللائم خلني مهلا  
لزمت الأعتاب وقرعت الباب  
قلت للبوابة: هلى ترى وصلا؟  
قال لي: يا صاح مهرها الأرواح  
كم محب راح يعشق القتلا  
- موشح أندلسي

## مجنون ليلى

يا مجنون ليلى..  
بكرة تبني لليلى ميت مزار  
لكن الحق بواقي مدينتك  
قبل الانهيار  
قيس ..  
ارحل  
اهرب م الحصار  
ليلى مش هتبقى ليك  
ليلى يا قيس جنتها نار

غني قد ما تغني  
واعزف على الاوتار  
الجب اللي ف مدينتك  
دا بواقي الاستعمار  
وهي دي الاقدار  
يعني هنعمل ايه  
دا قدر  
لو بأيدينا هنغير فيه  
أهرب من هنا  
اخلع قناع التضحية المستعار

قول لكل الاوليا

انا مش نبي  
مهاجر مدينتي وكوكبي  
اصرخ  
وسمعهم اذكارك  
من توراتك و م الاسفار  
نبأهم ان الربيع المنتظر  
اصلاً إعصار  
وناديهم من خلف الجدار  
عرفهم  
انك من الراحلين  
انك من الاحرار

راح تنكسر..وتغيب شمسك  
لكنك ف الحالمين..مخلد اسمك  
الوجود هيردد همسك  
مفيش مجال للاختيار

يا سكرانين.. من كاس الغرام  
يا مغرمين..العشق حرام  
هتفوق امتي.. يا محروم من الجنه  
دا كل اللي كنت يوم تتمنى ..طلع أوهام

يا مجروحين كفايا شقى  
كفايه بقى  
بلاه الانتظار

بشويش يا ليل السكارى المغرمين  
على الحالمين بغدٍ أفضل ..  
ف الدنيا ايه يسطل .. اكثر من الواقع  
الحزن لو هوّن .. كان البكا شافع  
زحف الملك بجيوشه .. عن وطنه بيدافع  
رجع الملك مهزوم .. رجع الملك راع  
اكفانه على ايده .. احلامه بتنازع  
رجع مكسور .. عماء النور .. حتى بدون دافع  
محلّمش على قده ولا لقاش له من شافع  
والزمن غدار  
من الافضل لو كان ع العرافين ميل  
وهو عارف من الاول  
ان رحلته محفوفه بالاحطار

يا مجنون ليلى  
سيها قبل ما تسيبك  
حسن النيه دا عيبك  
سهام الحب غدارة وهتصيبك  
احفظ جنودك  
لأخر معاركك  
قبل الحصار



من قواعد الحياة:  
قاعدة (١٢)

تود الحظ يتجاهلك  
تلعن ف النحس يندهلك  
كأن الحظ مش بختك  
والنحس من بقية أهلك

## دين الصوفى

يا بنت يم عيون جارحه تحت الطرحه  
هترجعي لقلبي الفرحة لو ترمي سلام  
كل الطرق ليكي دايب فيكي  
آه لو تأذني معاليكي راح أحي قوام  
متحني على قلبي بقطه ايا بطه  
يا حلوه يا رابطه القرطه مصره تمام  
وأعمل أيه ف بكره الآتي يا مولاتي  
دا لو هعيش عمري فلاتي هموت ع الاسلام  
ليه عمايلك كده فيا يا مفتره  
جرح القلوب عندك غيه بقى دا اسمه كلام  
كسري الهموم تنكسر أضحكي أكثر  
ومتبلعيش ريقك يسكر الخمر حرام  
يا صاحبه الخلال رني حلقى ظني  
لما بسمعي تغني بحسك أنغام  
أرفعي حجابك عني قربي مني  
أتمني قد ما تتمني عيشي الاحلام  
واذا كنتي يا حلوه هتسيني تجحدي ديني  
وحياتك لقطع شرايبي زي الافلام  
أصلي مش زي الشايح انا واد صايح  
ف عنهما ضايح وسط الالغام  
مين يقدر يحاكمها على جرايمها  
تحفه فنيه وراسمها أجدع رسام

شوفتها قلبي اتكسر حُسنها يسكر  
 حيمها ف قلبي بيكبر مع الايام  
 كل البنات منها طقت أوي واتبظت  
 لما النجوم من ضمها حطت ف حدودها كوام  
 شعرها سلاسل ذهب ويا للعجب  
 غرامها على قلبي اتكتب محلاه دا غرام  
 صوتها زي حفيف الشجر ف ليل وقمر  
 ويا لحن المطر يعزف أحلام  
 تشبه للملايكة الشابه حنين وغربه  
 تشبه لكنيسه او كعبه ف رحابها سلام  
 هقولها لها بعلو الصوت بحبك موت  
 ف مداراك سايح ف الملكوت زي الايتام  
 عايشه بين عيني ورمشي رافضه تمشي  
 تحفه لو شافها دافنشي كان صلى وصام  
 قولولها تخبي المرمرة الله اكبر  
 ف عنيا لوكت اقدر ابنيلها مقام  
 الحظ أتوزع كيلو باميه بسكينه حاميه  
 ومراية الحب العميه جدرانها رخام  
 ف دقيقه خطفت قلبي آه يا غلبي  
 حبيتها وانا أيه ذنبي مش عارف أنام  
 قولولها تحن شويه مره عليا  
 انا درويش م الصوفيه انا ديني غرام  
 الوصال قالو عنه رقصو وغنو  
 كل القلوب داقت منه ونا قلبي صام



من قواعد الحياة:

قاعدة (١٣)

بطل تتمدك بكل حاه كرهها..

زمن المعجزات انتهى

بطل توعظ كل ضال كأنك نبى

يا نجمة وحيدة بحزنها

عمالة تنزف ضيها..

م المستحيل من قدرك ف يوم تهربي

## لعنة العشاق

تهمسلي بكلمه وسط زحمه الكلام  
تحكيلى عن عشاق قبلنا ضاعو  
وعن عشاق ف يوم باعو  
وتقولي تفتكر..  
يمكن هوانا جوانا ف يوم يتكسر  
اطمنها حبنا غير كل البشر  
اقولها انتي الشمس  
تقولي وانت القمر  
اقولها حبك ملاني  
بدونك ناقص كياني  
تقولي خسوفنا قدر  
ولو زمانا يوم غدر  
محتجالك تطمني  
تخبيني فحضنك  
اقولها غني..  
فتغني..  
موال احزان  
تسكت  
تهمد الدنيا  
اقولها نكته  
ترجع ضحكته كأن ما كان  
زي الالوان

يتغير مودها  
اتهور  
امسك ايدها  
الاقمها دافيه وبالعافية ..  
احاول اسعدها  
كل حاجه كات بترقص  
لو تميل هي عودها  
ونا معودها ع الحنيه والامان  
اقولها: يا حبيبي مألُفلك غنوه..  
تقولي: اكيد حلوه..بدام منك  
سمعي..  
اسمعها  
بدايه القول  
اتغزل ف عنمها الحلوين  
بعد الصلاة على المجروحين  
واغني للمغرمين  
و أعيد و أزيد  
واتكلم عن حلمي البائس  
وإزاي كنت زمان يائس  
وكنت وحيد  
تنزل دموعي على خدي  
واقوم ثائرزي المجانين  
تلمسني  
اتهد والين



من قواعد الحياة:

قاعدة (١٤)

هياخدو منك كل حاجه .. قبل ما يدوك أي شئ  
فوق من اوهامك صحصح .. محدش هيدلك لطريق  
تعلقك بيهم خلاك.. زي تعلق غرقان بغريق

..

تعلقك بيهم تاعبك ..

واجعك..

اصرخ واصرخ محدش سامعك

بتتنفس دخان ف حريق

ازاي هتمحي أخطاءك ..

طول منتا ماشي ف نفس الطريق

## تاج ملوك الجان

دايب ولهان  
حبك ادمان  
لو بينا حيطان  
أسوار وبيبان  
ولو أحارب جيوش الجان  
وأرجع خسران  
عمري ما اكون ابدًا ندمان  
زي فراشه  
مهما تلف وتسافر  
لأبد تحن للاغضان  
فمنيش قلقان  
ف عنيكى سرحان  
لا.. انا غرقان  
ف قوام غزلان  
وف شفايفك حب الرمان  
ومنيش جني  
انا واد كحيان  
ومنيش قادر  
وياريتني اقدر  
اهديلك تاج ملوك الجان  
وابنيلك قصر من المرجان  
واعزم ف الزفه السلطان

واجيبك كل يوم فستان  
وافرثلك الارض بالحنه  
يا ست الحسن انا عطشان  
رحال تايه بقالي زمان  
وجيت مكسور على بابك  
ونفسي ادخلك الجنه



من قواعد الحياة:  
قاعدة (١٥)

حاول جرب جرب تاني  
خلص كل الاحتمالات  
احيانا يخدعك حظك  
وطريقك يخدعك اوقات  
ف الحياة كل شئ جايز  
بس انت قول عايز  
وما يفشل كل شئ  
جرب تقرأ التعليمات

## روايتك

و ف روايتك كنت الضحيه  
 لما زاد الموج نقدتك  
 ليه تزيدي ف القسيه  
 ارحميني من ظنوني  
 مهما قالوا وحكو عنك  
 لو قالولي عنبيكي خانوني  
 مش هصدق غير عيوني  
 مش هصدق غير ملامحك  
 ليه حبيبي بتوعديني  
 تبقي طول العمر جمبي  
 لما بكره هتسبيني  
 كملي وعدك ووعدني  
 متخافيش يا حبيبي عاندي  
 ايدك ف ايدي نقدر نعدي  
 نرتمي ف حضن المواجه  
 نرجع مع الفجر اللي راجع  
 ولو هيتسال حد فينا انتو مين؟  
 قولي عاشقين  
 مش هتفرق الاسامي  
 مش هيفرق احنا مين  
 كلنا هنا مظلومين  
 ومتطلبيش مني اسامح  
 كل حاجه ساعه فراقنا  
 كانت باينه ف الملامح



من قواعد الحياة:  
قاعدة (١٦)  
يا معشر العثمانين  
اخر الطريق مش جنه ..  
اخر الطريق فيه كمين.

مبقتش شجاع زي الاول  
يا حبيبي انا قلبي اتحول  
بقى شئ مكسور  
كسروني قبل ما اوصلك  
منعوني انا اشوف ملكك  
بنو حاجز بيني وبينك  
بنو ييجي الفين سور  
عموني فمشفتش شمسك  
يا حبيبي ولا شفت النور

## في عنيني عنواني

طال البعاد..  
والقلب لساه وحداني  
وانتي يا حلوه ..  
يا لحن يا غنوه  
لفين وخداني  
بقى دا اسمه كلام  
أسهر ومنام  
حبك ملك قلبي ف ثواني

إرجعي كفايه بعاد  
بطلي حبيبتني عناد  
لسه ما بينا معاد  
وانتي نسياني

حبك أسرق قلبي  
وتعبت من غلبي  
بدعي أنا لربي  
يجمعنا من تاني

ابعد بعيد إزاي  
وكل الطرق ليكي

وبيتي في حضنك  
وسعادتي ف عنيكي  
وقصايدي و الحاني

بشوفك صدفه ف كل مكان  
واكدب عينب  
و اما اناديكي ومش الاقيكي  
أكمل طريقى..  
واسرح تاني فيكي  
ويا حلوه عنيكي ..  
لفين وخداني

شكلي هويت العذاب  
والجرح من الاحباب  
حتى بدون أسباب  
دمع عنيكي بكاني  
والقمر اهو ظل وغاب  
وانتي نسياني  
لو يرجع بيا الزمان  
من تاني لنفس المكان  
كنت أختار الامان  
ف عنيكي عنواني



يلي انتو سايبين.. ف الذكريات علامات  
البعد مش هين.. حنوا لو اوقات

## غير كل البنات

مين دا اللي يقدر يعيش  
من غير ونيس يعيش معاه  
دا الحياة لو مكنتش قريك  
مش هتبقالي حياة  
حضنك مسكني وبيتي  
شعرك بتنفس شذاه  
وازاي قدرتي متسكريش  
وانتي شفايفك خمره تسكر  
اذا مريتي على درويش  
هينسى صلاته ..  
وف حسنك هيذكر  
كل حاجه حلوة فهم  
فيكي منها حاجه أكثر  
منتي غير كل البنات  
الحكاية فيكي حكايات  
هما يا دوب كانوا البداية  
وانتي يا حبيبتي التطور

\*\*\*\*\*

مفيش حاجه ممكن  
تخليني اضعف  
غير عيونك وابتسامه  
كلمه منك ..كلمه مني  
يبقى على قلبي السلامه

هى كلمه لو تقولها  
تنسيى الدنيا والى فيها  
عاوزين نجيب ف الدنيا ذكرى  
قبل ما تقوم القيامة

\*\*\*\*\*

وازاي اجيبك لو اتخاصمنا  
ورده أصلحك  
اذا كنتى ورده من الورود  
اخاف تغيرى  
وتقوليلي عشقت غيرى  
وتعلمني حربك عليا  
بالتار والبرود  
ثم إنك زي عود  
او وترزين كماني  
ثم يرضيكي أعاني  
واهرب فين من برفانك  
انا ف الوجود

\*\*\*\*\*

حتى قلبي مني تاه  
انسى اسمي ..انسى نفسي  
يا حبيبتى لو تحسى  
نص قلبك ..نص قلبي  
نص منك ..نص مني  
يا جميله لو تحنى  
تبتدى معاكي الحياه



ويحب الضحكه لو تبقى بدون عنوان  
واحب الشمل لو يجمع بلا استأذان  
واحب الناس الرايقه انا ف كل مكان  
الزمن هو الزمن والمكان هو المكان  
ليه ديما تغلب الضحكه الاحزان  
المشكله مش ف الوقت صدقي..  
المشكله الانسان

## زي نور

احيانا يكون ف حياتك ..

شخص قلبه زي نور

حليب بيور

صافي ودافي

بيخاصمك وبيتصالح

على طول تلاقبه متفاهم و بيسامح

القلب دا حافظ عليه

لو هتمشي يبقى جمبك

ف الضلمة ينورك

نعمة من الرب اختارك

عشان انت تستاهل

حد جمبك يكون شهك

يخاف عليك وتخاف عليه



من قواعد الحياة:  
قاعدة (١٧)

متقولش ليه دا بيحصلي..  
الجميع بيضحك وانا وحدي حزين  
اللي حصلك اكيد عادي..  
بيحصل لناس كتير تانيين

## الوعد

وَعَدْتِكُ إِنِّي هِنْسَاكِي  
ومش هرجع ف قراراتي  
وعدتك إِنِّي ولا بضعف  
ولا بفشل ف ثوراتي

\*\*\*\*\*

وعدتك اني هتجاهل .. عنيني لما تشاغلي  
وعدتك اني مش هكتب .. ليكي كمان اشعار  
وعدتك اني اقتلك .. لكني طلعت بقتلني  
كان وعدنا الجنه .. وازاي قبلنا النار

\*\*\*\*\*

وعدتك اني اقدراشوف الجنه من غيرك هنا ع الارض  
وعدتك اني هحرق كل جناين الورد  
وحلفت بألم هجرك وطول البعد  
من غيرك عادي أعيش  
وعدتك بالحياة ف الموت  
وعود يونس ف بطن الحوت  
نجي يونس .. وَعَدْنَا منجيش



## أنا كل حاجة وعكسها

أنا كل حاجة وعكسها  
أنا الربيع  
لما يدوم عطره  
أنا الشتا  
ببرده وريحة مطره  
أنا اللي بهرب م الوجع للآه  
فبحضن كل شئ القاه  
واكرر اسمه زي الذكر  
عشان بخاف ييجي ف يوم ينساني  
أو ييجي ف يوم انساه  
طبيعي اخاف من بكره  
واعمل حساب للذكره  
لأن دي هي الحياة



## قمر شاحب

عن عيني بعدتي لكنك قريبه  
وحبك ماليني يا أجمل حبيبه  
فلا البعد هو اختلاف المكان..  
ولا الحب يعرف قيود الزمان ..  
جيتلك وقلبي ماليه الحنان ..  
لقيت حد تاني بملامح غريبة

\*\*\*\*\*

فكرتك وطن لكنك مجرد ضيف  
قلبك مدينه مدمره من ركام الزيف  
عيونك مرايه مكسره  
سوادها أنعكاس لقمر شاحب  
بيعزف لحن.. نغمه زيف  
انا القتيل وعنيكي نكراني  
والإدعاء انتي والقاضي وسجاني  
الحزن بيبانه اتفتحو  
والفرح بابه مقفول  
وكان ف بالي أعيش  
لو كنت مش مقتول  
أو كنتي فكراني

\*\*\*\*\*

حلمت تكوني شطي وعنواني  
حلمت تكوني بعد الشك إيماني

مطر يروي عطش رملي  
فرح يفتح ببيان أملئ  
ولو أنساكي يا عمري  
بلاقي الدنيا نسياني  
كأن الوجود بدونك مشاع  
احساس طفل تايه جوايا بالضياح  
هو اكي ففتح ببيان الفرح  
وكانلي السعاده بعد الجرح

لقيت فيكي الوطن والبيت  
بقيت بشتاق وأنا جمبك  
صابتني سهام حبك  
ومعرفش إن أنا حببت

\*\*\*\*\*

هو النصيب يمكن  
هو القدر جايز  
انس اكي داممكن  
لكفي مش عايز

\*\*\*\*\*

حلفت بأني هنساكي  
مفتش يومين لقتي اشتقت  
لسه بشوف الدنيا ف ملامحك  
وكنت بقول دا مجرد وقت



من قواعد الحياة:  
قاعدة (١٨)  
نص الضحكه وجع  
نص الانين مكتوم  
وان قالو ضحك الجدع  
يبقى اكيد مهموم

## زهايمر

كان ممكن أو مثلاً جايز .. لو كنت ساعتها زمان عايز .. إني  
 انغير  
 كان ممكن ينفع ولكني .. احلامي بتهرب مني .. بكابرولا انا  
 متحير  
 دلوقتي اكيد لازم اقلق .. اوهامي مبقتش بتتحقق .. باينو  
 زهايمر

\*\*\*\*\*

مين فينا اختار شكله ولونه ..  
 مين اختار عقله وجنونه .. مين فينا اختار الغرق  
 مين فينا معش ف توهانه .. او نام ف مره على ودانه ..  
 وحيطانه اللي فاكرها هتحمية طلعت ورق

\*\*\*\*\*

الموجه بعد الموجه لو قدرت .. تنحت ف الصخور اوجاع ..  
 اشواق ساعه الفراق تتباع .. ونموت بالقهر  
 لوكل اللحظات الحلوه .. اللي ف حياتي او حياتك حسبها ما  
 تكمل شهر  
 هو ليه الاحزان بتاخذ مننا لحظات كثير  
 هو ليه فيه حد ديما بيسابقي وليه انا ابقى الاخير

\*\*\*\*\*

اقصى طموحك وانت وسط العتمه ضي  
 ابعد آمالك .. ترجع ماضي عُمرك مكانك يد فيه  
 هتستنى لحد امتي ف بكره اللي مهواش جي

وهو فيه ايه تاني فاضل.. غير نفس يتيم بيناضل..هنخاف  
عليه

\*\*\*\*\*

لفيت وشفيت  
كل الحاجات السهلة..بقت اصعب .. بمرور الوقت  
كل مركب حاولت اتعلق فيه.. يمكن اوصل.. هرب دلوقت  
وكل بحر مديتله ايدي يمكن من خلاله اعيش..  
فيه غرقت

\*\*\*\*\*

الليالي والساعات والحكاوي والاغنيات حتى شعري والروايات  
كلها حكايات خيال.. وهم انا وانت نجري قوام ونعلق نفسنا  
بيه  
وهنعمل ايه..الدنيا تحدي.. والواقع واقع.. بياخذ اكثر ما  
بيدي..

والحياة عمرها ما كانت وردى  
انا بسكر لكن متوضي .. انا واقف ديمًا ليه ضدي  
انا باب مقفول .. وعليه ترياس ..  
انا احسن واحد تلجالوف وقت الضيق ..  
يحللك كل مشاكله .. وف مشاكله يقف محتاس

\*\*\*\*\*

وشكلي عمري ما هتغير ولا اشوف الدنيا بتتغير  
مصيري اني اعيش واموت .. لو اني من البدايه سكوت  
تراب مكملش ولا بقى طين.. ولا عاش وسط البني ادمين  
جوايا صرخه لآخر مره بحبسها..  
عشان كذا ديما بختار الوحده وأنسها ..

خايف ف لحظه مقدرشي اراوغها.. وتتفجر فيكو ..  
ارجعو لحياتكو وانسوني وخليكو عايشين..  
جايز انسى.. او اقابل ناس تانيين  
اخر مره بحذركو .. بلاش غضبي لو هيسيبني ويختاركو  
بلاش قربي تكونو واقفين  
بلاه يا ملايكة قربكو مني.. انا شيطان من ضمن الشياطين  
ومتخافوش شيلو الوشوش .. عودت نفسي من زمان جدا ..  
مشتقش لصنف البني ادمين



السوداوية مش اختيار..  
كل حاجه بتدفعنا للدمار  
اصرخ بأعلى صوت ..  
ليه كل حاجه تلمسها تموت ..  
ليه ف وسط عزفك تتقطع الأوتار

## الرقصة الاخيرة

ارقص  
الرقص حرية ..  
البيني ادمين ملاعين  
احبي كل شئ جواك  
احلام..  
رومانسية  
العن كل شباك  
ممکن يغريك تاني ف الزنازين

\*\*\*\*\*

ابني قلعه ليه تبني بيت ..  
المسافه هتبقى اقصر لو جريت  
الرقصه الاخيره حرية..  
لو الرباط هيكلك  
ارقص حافي..  
وكمل المشوار  
امسح الدموع عن خدي وأرقص ويايا  
اعزف معايا النشيد الوطني للاحرار  
كسر جدار اليأس طوبه طوبه  
احرق توراتك آيه آيه  
غني مع الثوار  
اياك تختار الجنه لو فرضاً..  
اختار معايا النار

كون ضيّ العالم ولو ليوم واحد..  
خليك من المجانين  
اي حاجة خفت منها جربها..  
اخذت ايه يعني من صحبة العاقلين  
أتمشى ع الحبل زي بهلوان..  
إتمايّل  
كما كل شئ بيميل  
واياك تقع تتكسريا جميل  
هتلاقي كل شئ بدء يهرب..  
السما مننا بتقرب ..  
ولا بايننا مساطيل  
تايمين ف صبح وليل ..  
احلامنا نظاردها..  
نسابقها زي الخيل  
نلمسها ونقرب ..  
المسافه تصبح ميل

\*\*\*\*\*

المهزلة الوان..  
والناس صاييها جنان..  
زي السحره طير..  
كما ف الاساطير  
اختفي بلا اثر..  
بدون عنوان  
اكره كل حاجه ممله  
ف يوم اتمسكت بيها ..

اسوأ ندوبك خوف  
إسكر للمره الاخيره قبل الموقعه ..  
والعن ام دي ظروف  
الندم بيحرقك  
زيك منه انكويت ..  
ارفع ايديك للسما  
يتغفر ذنبك اذا صليت  
امبارح ..  
بكره ..  
سبيل للتراجع والدمار  
ارفع سلاح الحرب..  
انت من الاحرار  
قاوم او موت  
في سبيل حاجه لهما معني ..  
واهو يكون شئ بيجمعنا  
كل الطرق للانكسار  
انا وانت زي تلج..  
ومسيره يدوب ف النار



من قواعد الحياة:

قاعدة (١٩)

ناس غلابه وناس ديايه  
حبة طيبه حبة وحوش  
ف النهايه هتبقى وحدك  
مهما تقابل ف الوشوش

مش فاكركان أيه خلاني  
أتغير وأكون واحد تاني  
حد ميشم هليش ابدأ  
لا ف شكلي ولا حتى طباعي  
ونا كنت مفكر نفسي مهم  
سبتني الدنيا بستين ام  
و كنت هرد  
بس هقول أيه  
مفيلش داعي

ولا تطيل النظر في عينها فتصيبك لعنه العشق

## ديجافو

١

- هي كلمة بس ممكن  
تسمحيلي بالسؤال  
أصل انتي فعلا شئ يجنن  
زي م تخيلت فعلاً  
حاجه اشبه للخيال  
قالت لي بأيدها أمشي..  
ومسكت فيا بعنمها  
قصدت تقول أنت مين يعني..  
دي اول مره بتشوفني  
وكما لو كنت انا قدامها زي غريق..  
ومتعلق بقشايه  
رحال عاوز الاقي لغربتي نهاية..  
اطمن حاجه جوايا  
فقلتلها  
- يا ستي على مهلك  
اعتبريها تخاريف  
لو تسمى بالرد  
قوليلي طب من امتي  
سكنت ملايكه الارض!؟  
والفراق بين الاحبه شقى..  
ريحيني بقى  
وافتحي الجنه

لو كان الوجد سنه  
يبقى أكيد ساعة اللقاء..  
الحضن فرض  
وطالّ السكوت ..  
فسرحت ف الملكوت  
كأن القلب كان ضلمه ونور  
- هو انتي فعلا زينا  
اقصد زى جنسنا  
عارفه قوانين التطور  
=شكلك فاضى وجاى تهزر  
لو خطه الكون للقا ..  
تنفع تكون تريقه ..  
ابقى بهرج  
واسألي كويلو عليها  
هو اللي غواني بيها  
ولمحت سؤال ف عنيا  
انت يعنى تقصد ايه؟  
هوني الايام فى دنيا كئيبه مبتضحكش  
جايه ع الغلبان ولا عمرها نصفتش  
اقصد تكونى الدفا ..  
لو كنتي يوم منصفه  
هتعرفي انا قصدي ايه  
قصدي يمكن كون صغير..  
نعيش انا وانتي بس فيه  
قصدي يمكن لحن تحت المطر..  
نرقص عليه  
او يمكن دا كلو كان مجرد حلم عابر

انا عشت فيه  
 او وهم شدني فتعلقت بيه  
 اقصدا ان بحرك غواني لما ناداني  
 اقصدا اني غصب عني غرقت فيه  
 اقصدا ايه  
 هي المشاعر تتحكي  
 لو تغيريلي دنيتي  
 وتخليقيني ف كون بعيد  
 هنتقابل  
 وهتعرفي ان لقانا  
 يا حبيبتي مش جديد  
 وانا قابل  
 اموت فيكي  
 واصلي واصوم  
 واستشهد جوه عنيني  
 ولو يرضيكي اموت محروم  
 منا ليكي  
 ونفسي اني افوز بيكي  
 ولورمتيني من سفنك  
 هرجعلك عوم  
 =تفوز ازاي ؟

- فكري بس ف بكره الجاي  
 يا ست الحسن  
 انشالله يخبطني طرماي  
 يمكن ساعتها تشوفي  
 نزيف روجي

وصورتك اللي جوايا  
معلمه ف جروحي  
هتقولي حبيتك أمتي  
عارفه الديجافو؟  
الموقف اللي بيحصل  
ويحلفولك ان قبل ما يحصل  
كانو يعرفوه  
ولو مش عارفاه  
اسمحيلي اني اشرحلك معناه  
لما قابلتك دلوقتي  
كأني ف حلم  
وبره جسمي واقف  
بتفرج على فيلم  
وشايف مشهد قدامي  
لواحد شاف حلمه رمادي  
قال مش هيسيبو المرادي  
قابل بنت بالصدفه وأتجرأ قال  
هي كلمه بس ممكن  
تسمحيلي بالسؤال

٢

يا ست الحسن على مهلك  
بلاها سكه الاشواق  
دا كل الذنوب تغتفر  
الا الفراق  
ونا من زمان مشتاق  
اصادف نصي لجل اكمل

ولما قابلتك لقيته اجمل  
ويا ستي متقلقيش  
دا مهما غلطتي هتحمل  
ولو وقفتي انا هكمل  
وهستحمل  
منا اخترتك  
وراضي بمصيري م الاول  
زي فوله يا حبيبتي انا  
ومقسوم نصين  
ولو اسيب نصي معاكي  
طب ارواح على فين

\*\*\*\*\*

معاكي ببتي رحلة المجهول  
وبتوه فيكي  
حاجه من جوايا خلتنى انا ديكي  
كأن ايه خلاني اتغوي بيكي  
اقولك يا ست الحسن احلى  
ولا يا ست الكل  
صباحك فل  
ف الغرام لا انا بزهدق  
ولا حتى بمل  
ومنيش منقول  
غير لما ترسييني على حل  
او تسمى بالرد  
قوليلي طب من امتي  
سكنت ملايكة الارض!؟



من قواعد الحياة:

قاعدة (٢٠)

الحلم لو طال.. لساه برضو حلم ..  
اياك تبني اوهامك عليه  
الفيلم لو بوخ مش هتتم نهايته إيه  
الدنيا مش مسح.. دي شكلها كباريه

قالولي يا تكون شجيع السیما یا تكون بهلوان  
هنا راحة البال وهنا الظیطه والابهه والهیلمان  
على الحبل ماشي ما بين دا ودا بقالي زمان  
واحترت انا ابقى مين فيهم  
لا عارفي شجاع ولا عارفي جبان

## من مراسيل العشاق

١

- سلام يا حبيبتي انا مهاجر ..  
هتوحشني عنيكى السود  
وسلام على حب جمعنا ..  
جايز علشانه تانى نعود  
● استنا حبيبي مشتاقه ..  
لعيونا لما تتلاقى ..  
لسه ما بين عيونا وعود
- ارجوكى حبيبتي سامحيني  
بلاش بالقرب تغربني  
قراى زى حد السيف  
بيقطع فى شراييني  
فصعب جداً تفهمي قصدي ايه؟  
● كل وعد انت وعدته  
كل الكلام اللي زمان قلته  
آمنت انا بيه
- كل الاشارات بتقولى ابعد  
● بقى عايز تبعد وتسيبني  
- انا اسف جداً سامحيني  
● مش قلت زمان انت حابيني  
- مش بأيدى صدقيني .. دا قدر مكتوب عليا  
هاتى عيونك كدا ف عيونى .. وانتي تعرفي اللي بيا  
● قرب مني .. حضني براح .. تلاقى امان

- ازای ارتاح ..
- وانا اصلا ف جراحي غرقان
- انسى همومك .. اهزم خوفك ..
- جايز جرحك يطرح ورد
- افرد جناحاتك ..
- القطر الحقه لو عدى وفاتك ..
- عمر غرامنا بعمر الارض
- حاسس بحاجه مخوفاني ..
- خوفي مني من زماني
- والأمانى..
- لو تغيب تصبح رماد
- هتغيب هناك وانا هستناك ..
- وهتعشق تاني وتنساني ..
- وتنسي هوايا والحاني ..
- ولغيري تغني ..
- ولا هيفرق معاك طعم البعاد ..
- ولا نار حبيبتك والسهاد
- يومها هندم اني سبتك وانت مني
- انا لو ببعد عنك ببعد عني
- ولغيرك انا هرفض اغني
- وازاي ترضى انك ف بعدي تعيش؟
- متسألنيش
- لقانا قدر
- فراقنا قدر
- عشقي ذنب رافضه منه اتوب

- قدرى اسافر دنيا مفرقه ف القلوب
- لكنى بخاف على هوانا ف الضلوع  
سنين الغربه هتقسىك ..  
يومها هتمل الرجوع
- ليه الخوف من بكره مدام مكتوب
- ادتني الدفا والحب
- ادتيني سبب عشان اعيش
- ازاي بقى احلامنا كذب
- للاسف مفهمتنيش
- قولى مين هيسمع غناوينا ف بعدك  
وازاي هقدر اعيش بعدك  
ولمين هنشكي غير لبعضينا  
ومين ف الدنيا دى هيقدر  
يرجع نبض الحياة فينا
- مهما هيطول الفراق .. هيبجى يوم وراح نعود  
هيرجعنا الاشتياق .. بسحر عبيره ف الوجود
- رحيلك مش فاهماه .. ليه تسببني ف حيره وآه  
خلاص مبقتش متحمله
- بلاها كتر الاسئله
- المشكله .. بُعدك وخوفي .. ارحم دموع عيني  
قرب والمس كفوفي .. جايز من تاني تحيييني

- شوقي ف عيني مفضوح  
ياما حلمت افوز بيكي ..  
وما استسلمت لعنيكي  
لقيتني من زمان مدبوح
- ازاي بتبوح بكلام العشق .. وبعد ما استناك ..  
تقول مدبوح..دا فداك الروح .. لو يوم هتروح ..  
طب خدني معاك
- متعود قلبي ع الجراح ..  
عمره حبيبي ما يوم ارتاح  
اخاف لو اخدتك ف سفينتي ..  
احرمك من طعم الافراح
- بجد حبيبي مش قادره
- بجد حبيبي مش قادر ..  
اكمل طريقي للاخر  
اديت ضهري بالامان مره ..  
رمانى العمر بخناجر
- شاركتي حبيبي احزانك ..  
وارمي حمولك على ضهري  
واذا العمر ف يوم خانك ..  
هطلب ضحكك مهري  
مش هتفرق ..  
مننا مالك كل امري
- انا ملعون ابد الدهور والأزمنه

- ومليش احلام..  
 تقدر تكون يوم ممكنه  
 وازاي اكون..  
 اذا كنت تايه مين انا !
- عشقاك مهما تكون .. ملاك او ملعون  
 ارحمني من الظنون .. وتعالى مستنياك ..  
 طمعي ف الحياه من تاني  
 ف عتمه ليلي كون قمري .. وردى لوي طول سهري  
 انا مشتاقه يا عمري .. لحضنك يروي شرياني  
 وراسملك قلبي طريق مسحور  
 كاتبلك سر السعاده سطور  
 واذا فكرت تاني تتوه  
 توه جوه مني تلاقى النور
  - ما انا تايه فيكي من زمان  
 وبابن عليا اننا غرقان  
 لكني واد سنكوح خايف اوعدك  
 والعمر ماله امان
  - لو المسافات بينا تروح  
 تلاقى الف باب مفتوح على الجنه  
 يا عم السنكوح انا اتمنى .. اعيش وياك  
 دا حبك ساكن جوه الروح

- كل حاجه فيا تاهت
- هكون سماك تكون ارضي
- ملامح وشي حاسسها شاخت
- ابتسم ترجع قدى
- لون الحياه باهت
- لونه بلون وردي .. لون كسوف خدي
- ولو خان الزمان
- اسند على كتفي وهتعدي
- كفرت بكل شئ ..
- وأمنت بس بيكي
- يمكن حبيبتي اتولد ..
- من جديد على ايديكي
- ويا كل ابواب الجحيم ..
- لسه الامانى ممكنه
- لينا رب عليم ..
- قادر يخفف عنا
- حبك حلم عايشه انا فيه ..
- لو دبل ورده بدموعى هسقيه
- باعت رمش عيني مرسل ..
- جواه سؤال
- قررت من الاول تبعد ليه
- لو كلنا مرتاحين ..

يبقي النضال لزمته ايه؟  
طعم الحاجات احلى ..  
لما بصعوبه نلاقها  
قلوب البشر وحله ..  
لمعها تلاقي احلى ما فيها  
كل واحد جواه حاجه حلوه ..  
بس انت شاورله عليها  
- وجودك جمبي يعني ..  
رضا ربنا عني  
يا عايشه ف العين والنبي ..  
لمين غيرك انا اغني  
وافرح يوم ما القاه ..  
وجودك جمبي خلاني ..  
من تاني احب الحياه  
يا ريحه الورد البري ..  
يا نور الصبح يا عمري ..  
لو كان الامر بأمرى  
واذا كنت اقدر أكون ..  
من بدري ..  
لصوتك كنت ابقى صداه



أنا قديس مليون ذنوب  
صليوني ع الجدران  
بجرّيمه مجهوله  
وياريتني اقدر اتوب ..  
من ركعتي الاولى  
متسألشي ايه جراك  
قولي هيعمل أيه نضالك..  
ف سبيل ممالك رفضاك..  
أبوابها مقفوله

انتي الحلم اللي عاش يراودني ومتحققش  
وانتي الحكاية اللي شغلتي ومبتخلصش  
خذتني عنيني لحدود الجنه ونسيتني  
يا همس اللحن اللي بيطاردني ومبيكملش

## خسوف

" سهم الهوى صابني ..كان أيه م الهوى نابني "

-١-

أول جواب م القلب  
أكيد ف هوا عنيك  
وإذا كنت يوم محتاس  
بينك وبين الناس  
أكيد هميل ليك

-٢-

- كلمي جنية الاحلام عن حلمك  
هتسمعلك  
وكل حاجه حبتيا.. حلمتي بيها  
وبعدت عنك  
هتلاقي طريقها وترجعلك

-٣-

والبنت تحب الجدع  
اللي مهما بتهرب قوام يلقاها  
ومهما بتبعد يستناها  
اللي بيكسراي ظروف  
اللي بهزم أي سحابة حزن وخوف  
تفوت جواها

-٤-

- الصفحه اللي قلبتها .. اياكي ترجعي تقريها  
هتقدري تعيشي بعدها.. يعني هتاخذ وقتها  
شويه قبل ما تنسها  
= واعمل ايه بشتاق ساعات  
- قصره يعني.. اللي حيّ جوه قلبك  
اكيد ابقى م اللي مات

-٥-

= على ابواب الحياه واقفه  
ندهت كثير محدش رد  
حاولت اجري..  
حاولت أطير..  
كسرت حدود الخوف  
وحدود الطول والعرض  
لو كان بايدي أختار..  
مكنتش هعيش ع الارض

-٦-

فيها حتة من الملايكة  
فيها حاجة من النجوم  
فيها كل اللي ياما أتمنيت  
إني اصادفه وأشوفه ف يوم

-٧-

= يا فرح قريب علي بابي  
انا سامعه حبيبي بيندهلي  
جالي ف المنام وهداني يمام  
حرير من الهند وذهب م الشام  
وبتالي مقام جدرانہ رخام  
ونا قمت مصدقه من جهلي  
- تستاهلي

= فضلت كثير مأمنش  
واسوني قالولي مخفش  
المشاعر مبتخلصش  
الحب شوق وفراق ووعود..  
واللي يحب مسيره يعود  
- اللي يحب مييرحلش

-٨-

- احتياجك لهم ضعف .. بالوقت بيصبح داء  
= مولانا ، الكبُر حرام

- دي فضيلة الاستغناء  
-٩-

الكلام صعب أنه يوصف حسنها  
العنين صافيه وبرينه ..  
زي شوارع القدس العتيقه  
كل اللي شافها  
حلمه كان يحتلها  
-١٠-

- إرضي بقضاء العليم.. لينا رب كريم  
= لأمتي انا هستي.. دا وعدنا بالجنه .. وملقناش غير الجحيم  
-١١-

- حاولت كتير مبوصلشي..  
مشتته بين الأختيار والفرض  
مهما اقابل ف ناس بمشي  
حدودي تتمد  
وبكمل غصب عني اكيد  
بايني أسيره ف دنيتكم  
هنا ع الارض  
-١٢-

تاني جواب ليكي  
نداء عاجل لمعالكي  
من محطة قلبي لعنيكي  
قبل رحيلك.. بشكيلك  
بقول لو ينفع..  
خليكي

-١٣-

ثم بحرك لو غواني  
غصب عني ارجعله تاني  
ثم روجي لو تروحلك  
يبقى فاضل ليا ايه  
ثم كان نفسي أبوحلك  
باللي ياما حلمت بيه  
ثم الايام معاكي بتحلى  
ثم رقصك يبقى أحلى  
لو ترقصي حافيه باليه

-١٤-

كالعاده بتظهر هي  
بجبروتها وبقوتها  
وتدور جوا حياتها  
تلقمها مليانه دموع  
مهزومه كان ايه شعبطها  
ف حبل اساسا مقطوع  
مكسوره بتداري بضحكتها  
القلب الموجوع  
بتصرخ جواها وبكاها  
مهواش مسموع  
ماهى اصلا حلفت متيين حاجه كسراها  
وهتفضل تضحك ديما كدا من براها  
عندها قواها.. ومفيش عنه رجوع

-١٥-

كانت وطن بيحتوي وقت ضعفي  
 كانت شعرف عالم بيتهجا الحروف  
 كانت سما وجميعهم بلا أجنحه  
 كانت سيمفونيه بتتحدى الوجع والخوف  
 اللي بيفسدو العالم تصلحه هي ببتسامه  
 كانت نور وقت ما يصيبني الخسوف

-١٦-

- عماله تبعدي عن كل الناس  
 وكأنك شارع مهجور..  
 أرض بتنبت خضرة  
 صابها الهم فصبحت بور  
 أياكي تبكي ع اللي فات  
 أتعلمي إنك تحفظي المسافات  
 وأهي أيام بتعدي والأحزان كاس بيدور

-١٧-

فيه نظرة بتختصر لغات  
 وصوت بيختصر مسافات  
 يلي إنتي قادرة تختصري الحياة  
 عنيني بتختصر كل الحاجات

-١٨-

- مهو أصل الحياة دي طريق  
 مش مدينة لك بشئ  
 ولا مرة هتجبر خاطرک  
 ولا تطبطب عليك صدقي  
 لو عايز حاجه اسرقها  
 !!.. =

- أحسنلك تفهم بيبي

-١٩-

- أهتم أوي باللي يحبوك  
وعلى قد ما تقدر فرحهم  
اهتمامك بينور ملامحهم  
على قد ما تقدر قدرهم  
وإياك ف مرة تكسرهم  
تخسرهم.. صعب ترجعهم

-٢٠-

- وازاي هتكسب ف الحياة من غير محاولة  
= الحب أولى ولا الوطن  
- الحب أولى

-٢١-

محال إني أشوف غيرك  
محال إني أحب جديد  
وأحب أنا مين؟.. غيرك إنتي  
بسيب الدنيا وأجيلك وبرمي الهم..  
أسمعلك وأشكيلك  
فعادي لما أحتجلك أم  
وعادي لو تكوني بنتي  
دا أنا منك..  
أنا إبنك..  
أنا جايز أكون إنتي

- ٢٢ -

ضحكت عيونك والشفاف  
اللي يكون قدامها خايف  
والكلام الحلو بينا  
لو قالولي تشبه لأيه  
كنت أقول والله جنه

- ٢٣ -

حلمهم وحدة وجزيرة  
كنوز كثيرة  
بحر وسما  
إنما  
حلمي أنا أفضل أنا

- ٢٤ -

آخر جواب ليكي  
سؤال عن الأحوال  
ومهما عقلك مَال  
الحب قبل المَال  
مهما غدر بيكي



## جواب لربنا

حاولت اجيلك  
اترمي في حضنك  
يارب..  
محتجالك  
مشتقالك  
جوايا حكايات كثير  
عن جنحاتي المكسوره  
وحلمي اني اطير  
قصرت كثير انا عارفه  
لكنك ديما على بالي  
ومش نسيك

\*\*\*\*\*

يمكن معرفتش اوصلك  
لكني متطمئه جيبك  
و جواباتي اكيد بتوصلك  
طفله و متشعبطه ف ضلك  
جيبالك وكلي كسوف ..  
تعبت من الالم والخوف  
وحيده وايه يعني  
وحدك بتسمعي ..  
جيبلك ..  
ايوه جيبلك  
برغم التوهه والاهه

والصرخه الى حبساها  
وكانلي رغبه ف المواساه  
احلامي كأنها لعنه  
وليه زمانا يمنعنا  
نقابل ناس تودعنا  
وناس لذتها ف وجعنا  
حياتي بتتقلب مأساه

\*\*\*\*\*

وكنت صادقاه اوي المرة دي  
ف الجيهه..  
ومليش غير رضاك غيهه..  
يارب ...  
جيكالك  
تركت الناس والاهل والصحبه  
ومش خايفه ..  
عشان عارفك  
اكيد جنبي  
يا اول حد بلجأله  
ف وقت الديقه والمعاناه  
بترجعلي ولو قصرت  
تسامحني مهما غلطت  
وتفهمني مهما عملت  
كنت مطمئنة المرادي  
ومشتقاقيه  
لكني رغم عني فشلت



من قواعد الحياة:

قاعدة (٢١)

كل شئ ف الدنيا باعك

ف مين يخاطر يشترك

إهداء خاص لشعب الزمالك  
الذي يتضرب بيه المثل في الوفاء والحب والاخلاص

فسلاماً لهم وورد وقصيدة!

## مدرج تالته يمين

- ١ -

يا زمالك يا حي الوحيد  
يوم نصرك دا يوم ليا عيد  
غير مجدك ايه هتمنى  
لومت هخش الجنه  
مستيني ٢٠ شهيد

\*\*\*\*\*

هشجع تانى ومش هخاف  
عمري ما همل من الهتاف  
التالته يمين عنواني  
وحي دا إعتراف

- ٢ -

مفيش زيه ف الكون  
وراه فين ما يكون  
وصفو حي له جنون  
انا من غيره ازاي اعيش  
من غيرعشقه مين اكون

\*\*\*\*\*

وهتعمل ايه لو كنت مكانى  
 أهديله قلبى ومش هعانى  
 لو بس انطق حروف اسمه  
 يتهز كيانى ..  
 وهقولها تانى  
 الزمالك..  
 وطني وعنواني

-٣-

طول عمري مخلص للكيان  
 وتملي وراه في أي مكان  
 و أدبه فوق عمري ..  
 عمر تانى كمان  
 ويفضل علمه  
 ديماً في العالى  
 يا زمالك يا غالى  
 انا عاشقك من زمان

-٤-

احنا جيشه..درعه..وسيفه  
 احنا صوته لو يوم هيكلوه بالسكات  
 احنا شعبه اللي لحماه عاش  
 واللي ف عشقه مات  
 احنا ماضي كتب الذكريات  
 واحنا بكره بنحقق معجزات

-٥-

و من تانى اكيد هنرجع  
بأعلى صوت نشجع  
ونهتف زمالك  
لودمانا هندفع

-٦-

يشهد على عشقي ٢٠ شهيد  
وايد اخواتي ف الحديد  
علشان يفضل علمك عالي  
وتشرق شمسك من جديد

-٧-

لا يمكن تموت الفكره  
عيش ناضل لبكره  
اسأل زامورا وحليم  
غنوه برددها  
من تانى هقولها واعيدها  
يا زمالك يا عظيم

-٨-

لونا كل حاجه ابيض زى لونه  
وانحنينا للشعار  
وعرفنا ان حبه حاجه غصب  
مش اختيار



وزي ما رححت  
زي ما جيت..  
طال الطريق  
ضلّيت

## الفهرس

٥.....	إهداء خاص
٦.....	إهداء
١٣.....	وهم
١٩.....	عناد
٢٢.....	زى النسيم
٢٦.....	علي حافة الإتهيار
٣٢.....	طيف
٣٤.....	رقصة باليه
٣٨.....	شروخير
٤١.....	اوبرا
٤٤.....	ما بعد غروب الشمس
٤٧.....	تلج و نار
٥٠.....	نسيك
٥٢.....	آخر شروق للشمس
٥٥.....	حلم جوه حلم
٦٠.....	عبلة
٦٣.....	علي شط إسكندرية
٦٥.....	هيلانا
٦٩.....	مجنون ليلى
٧٣.....	دين الصوفي
٧٦.....	لعنة العشاق
٧٩.....	تاج ملوك الجان
٨٢.....	روايك
٨٥.....	في عنيكى عنوانى
٨٨.....	غير كل البنات
٩١.....	زى نور

٩٣	الوعد
٩٤	أنا كل حاجة وعكسها
٩٥	قمر شاحب
٩٨	زهايمر
١٠٢	الرقصة الأخيرة
١٠٨	ديجافو
١١٥	من مراسيل العشاق
١٢٥	خسوف
١٣٣	جواب لربنا
١٣٨	مدرج تالته يمين



---

الإسكندرية ج . م . ع

(+٢) ٠٣ / ٥٧٦٥٧٧٧

(+٢) ٠١٠١٨٨٣١٣٦١

---

حسنا للنشر والتوزيع

